

Inauguraziun da la Canti Plessur en nova glischur

La sanaziun cumplexiva da la Canti Plessur è terminada

DA MARTIN CABALZAR

■ **Suenter dus onns da construcziun ha la scola chantunala puspè pudì surpender cul cumenzament da l'onn da scola la Canti Plessur (Chasa Cleric). Il bajetg che resplescha en nova glischur suenter ina renovaziun cumplexiva vegn inaugurà questa fin d'emna cun visitas guidadas, expositiuns e concerts.** Sco quai ch' il rector *Gion Lechmann* ha infurmà ier ils meds da massa maina la scola chantunala actualmain in gimnasi da lunga e da curta durada, ina scola media propedeutica cun maturità spezialisada sco er ina scola media commerciala cun maturità professiunala. L'onn da scola 2012/13 frequentan radund 1230 scolares e scolars la Scola chantunala grischuna. Passa 150 magistras e magisters instrueschan e 25 persunas èn engaschadas en servetsch da logistica, assistenza e biblioteca guardan che tut funcziunia senza incaps. Cun la segunda gronda etapa da la sanaziun generala da la scola chantunala mettia la Canti Plessur uss a disposiziun in'ulteriura infrastruttura topmoderna che promovia il plaschair d'emprender.

Ina impurtanta incumbensa statala

Sco quai che cusseglier guvernativ *Martio Cavigelli* ha accentuà ademplescha la Scola chantunala grischuna ina impurtanta incumbensa statala per la scolaziun e furmaziun e prenda commensuradain resguard da la trilinguitad grischuna cun las linguas tudestg, rumantsch e talian. Il chantun mettia a disposiziun l'infrastruttura necessaria e la responsabladad per la planisaziun ed execuziun

da questa incumbensa haja l'uffizi da construcziun auta. La scola chantunala saja vegnida fundada 1804 ed en il decurs da l'istorgia saja la scola chantunala stada etablida en differents edifizis. La stad 2010 hajan ins pudì surdar la «Canti Halde» a sia funcziun, in onn pli tard hajan ins realisà la colliaziun da stgalas tranter Halde e Plessur ed ussa saja era la sanaziun cumplexiva da la Chasa Cleric terminada. La sanaziun saja vegnida realisada tenora auts criteris da qualità e tegnia era quint dals aspects ecologics

cun ina reducziun marcanta dal consum d'energia ed haja er eliminà ils privels da sanadad pervi dal material da construcziun, punctuescha Cavigelli.

Continuà cun la tradiziun da la chasa

Il responsabel dal departament d'educziun e cultura per las scolas medias accentuescha che la Canti Plessur haja betg mo mantegnì la structura architectonica da l'edifizis vigl da l'architect *Liescha*, ma bain sviluppà vinavant quel. Er a la scola chantunala hajan chant e musica, l'art fi-

gurativ e la lavur manuala vinavant ina gronda impurtanza. En quest regard vegnia la tradiziun oriunda dal seminari da scolars manada vinavant. La colliaziun per peduns e l'ascensur per persunas impedidas e per il scolars collià uss a moda natirala la Canti Plessur cun la Canti Halde è saja in impurtant scharnier tranter ils dus campus. *Hanspeter Märchy* è pervadi che l'architectura ed ils indrizs funcziunals hajan in bun effect per l'atmosfera, il clima, las relaziuns ed il process d'emprender.

Ina sanaziun cumplexiva

L'architect chantunal *Markus Dünser* numna la sanaziun e renovaziun da la Chasa Cleric in impurtant term en il rom dal project integral «sanaziun da la scola chantunala». Resguardond l'incarica cumplexa da la renovaziun haja il chantun instradà ina concurrenza d'architectura cun la finamira da cuntanscher ina sanaziun d'alta qualità entaifer in temp util ed a moda economica. Gudagnà la concurrenza haja il team da HRS Real Estate SA a S. Gagl cun il project «Denkmal» elavurà da *Pablo Horvát* da Cuir. Cun questa chaschun haja il bajetg construì en ils onns sessanta tenor ils plans da *Andreas Liesch* era survegnì in indriz climatic. Duida atenziun hajan ins era dà a l'art vi dal bajetg.

Respectà architectura oriunda

La schefa da construcziun da HRS Real Estate SA *Rebecca Zuber* ha accentuà ch'ils planisaders hajan respectà tant las colurs sco ils materials da l'edifizis existent uschia che la novaziun dettian strusch en egl anorvers. Internamain hajan ins dà gronda atenziun da pudair satisfar als basegns pretensius d'ina intrucziun moderna. Dal tuttafatg nova saja la tecnica da chasa che controllescha ed optimescha permanentain l'adiever d'energia. Per dablera rumpatesta haja l'allontanament da materias nuschaiavas per la sanadad procurà. Cun ina buna tecnica d'isolaziun hajan ins cuntanschì il standard da classificaziun da minenergia.

Satisfatgs da l'ovra reussida: l'architect Pablo Horvát, la manadra da construcziun Rebecca Zuber e l'architect cantunal Markus Dünser (da san.).

FOTO Y. BÜRKL

Ils dis da las portas avertas dal stabiliment renovà ha lieu venderdi da las 16.00 fin las 20.00 e la sonda da las 10.00 fin las 20.00.

